

太谷縣志總目

卷一

圖考

星野
公署

疆域
學宮

山河
書院

城池
十景

星野

疆域

附
關隘
津梁

卷二

沿革

山川

城池

附
村堡
砦墩
營房

公署

附坊表

學校

壇廟

附寺觀

卷三

古蹟

附碑碣塚墓

水利

田賦

附鹽法

風俗

附土產

職官

名宦

卷四

科目 附鄉飲

仕籍 附封典

卷五

人物 分封 功勛 忠烈 宦蹟 儒林
篤行 耆善 仙釋

列女

卷六

藝文上

御製附明勅諭疏檄序記

卷七

藝文中傳墓誌

卷八

藝文下墓表附祭文賦詩

太谷縣志卷八

墓表

明

文學孔環橋墓表

韓宗文

君諱進覺環橋其字也曾祖諱公幹生曷曷生思唐娶智氏生二子次諱長爲君君生而岐嶷頤碩瞻視不常二旬餘補邑庠弟子員孝事父母夜必溫清旣寢屏息伺牖外安枕則歸臥否必詢所以父嘗病溷溺必視其色知無恙則色喜母患腹

疾侍湯藥不解衣帶朝夕周旋畧無倦容父母卒
哀毀骨立三年盡禮生平口不言貨利貲產計簿
皆綜理弟手省試所需索之弟歸卽予其橐平生
喜飲而不及亂所交皆雅飭士家道繁昌終其身
所著皆布衣芒屨至如嚴氣正性一事所爲不當
如莽蜂之在體學使者廉優行君常與焉無何邁
疾終崇禎六年十月四日也距生萬厯十年六月
二十一日享年五十有二子二長仕魯邑庠生次
變魯邑庠生銘曰幽阡孔安以棲其魂松柏茂矣

宜爾子孫

國朝

翼城縣訓導吳君墓表

進士王系榆次人

君諱瑛字玉英號蓮溪前世代有偉人王父旺山
公廉幹勤敏以計然策起家尊人靜觀先生天性
豪邁讀書過目成誦蚤歲補博士弟子員旋餼於
庠年近知非卽成歲進士君善繼父志攻舉子業
弱冠遊庠數載不售歲辛未以例貢入成均天性
純孝父卒哀毀骨立一切祭塋如禮而春露秋霜

之感數十年如一日生母喬太孺人賢而蚤逝事繼母張愉色婉容敬養兼至他若交友以信待人以誠篤於宗族厚於親串更難屈指數也居鄉嘗設絳帳授生徒慇懃誘掖終日不倦遊其門者多所成就歲己丑秉鐸翼庠集諸生於明倫堂分題角藝而甲乙之文風丕振科第倍盛於前其有志科舉而苦貧乏者輒給與之辛丑翼邑大荒奉憲賑饑君於窮山僻壤之中足跡遍至務使實惠均沾洵稱不愧厥職者無何以疾卒於官時康熙六

十一年十二月初四日也距其生於康熙四年七月十三日享年五十有八元配安孺人性情和淑年十六于歸事繼姑張順志承顏克敦婦道持家甚勤夙興夜寐躬先倡率凡歲時伏臘祀祖奉先蘋蘩筐筥必盡誠致潔至於教子孫待婢僕勞以成愛嚴而寓寬且性好施與親戚里黨有所求毫無吝惜孺人生於康熙六年六月初六日卒於雍正六年三月初二日享壽六十有一生丈夫子五長其謚字子安太學生次其誠太學生次其詡太

學生次其諡增廣生次其讓廩膳生女二孫男十五孫女十三雍正七年三月廿八日合塋於城南南張村之原先期遣人持行狀求余文以表墓榆與谷邑壤相接知先生與孺人之行誼詳且悉不敢以不敏辭因厯叙其大概焉

贈修職郎杜君墓表

提督學政黃淑琬
宛平人

君諱博字約夫先世本秦中人始祖讓甫明初徙居山右遂爲晉陽太谷人屢世以儒起家大父諱奇榮爲邑名諸生豁達曉大體明末流寇薄城闔

邑惶懼因縋城說賊緩攻已而官兵四至賊乃潰
去其他排難解紛談言微中大率類此父諱書林
字文苑

國初取士入學爲首選弱冠食廩足跡不履市廛母
白氏棄君襁褓中繼母胡氏撫君成人生而岐嶷
不喜嬉弄雖尊長不幼狎之甫授書寓目成誦出
語驚人比長丰骨聳秀如寒松秋鶴亭亭物表遊
庠食餼皆冠一軍才名藉甚諸先達以第一人期
之顧數奇屢困場屋同志輒爲不平君恬然處之

旣乃益下董帷沉酣經史貫串百家遐邇負笈從
遊者戶外屨常滿焉君性最孝事親色養痛幼失
恃每逢忌辰及已生日輒號泣不起事繼母下氣
怡聲不違其志三十年如一日居喪哀毀骨立殯
塋悉遵家禮雅不喜浮屠方士家言爲人剛正廉
介遇事敢言邑有建議當事者每借箸焉君籌畫
切中機宜未嘗絲毫利己其在學校則肅體統慎
名節多士奉爲楷模嘗謂學者必先立品行若行
已有虧縱侈談性命皆浮詞耳家徒四壁不事生

業課授生徒外不肯干人以私修資偶贍則以賑
夫窘急無告者貧而好施蓋其天性然與治家嚴
而有法諸子有過懲創尤切雖孩提稍長不少假
以辭色人擬於漢石氏云生順治丙戌年九月十
日戌時卒康熙丙子年八月十日寅時享年五十
一元配王幽閒慎淑不愆於儀善相夫子克敦婦
道生順治己丑年十一月二十一日未時卒康熙
癸丑年四月二十三日未時享年二十有五繼配
李事姑能孝撫孤以慈節儉寬仁終身如一生順

治戊戌年正月十二日亥時卒雍正乙巳年二月
七日辰時享年六十有八丈夫子五冠瀛王出甲
瀛元瀛邑庠生先瀛康熙辛丑進士內廷教習首
瀛舉雍正癸卯鄉試第一俱李出女子三王出者
一李出者二孫男六方升方興方盛方至方穀方
將會孫男二祁郊將以今年十月六日合葬於城
西付井祖塋之兆乞文於余余與兩生有通家誼
故爲援筆而表君之墓

贈文林郎文學名世武君墓表

任蘭枝

溧陽人

丁未春

世宗憲皇帝御極之五年余與門人鄒君升恒同分校禮
闈山右孝廉武子一韓出鄒君門下越四年辛亥
除授直隸宣化府懷安縣令雍正十三年乙卯恭
逢

覃恩例得以已身妻室封典貤封其祖父母遣伴走京
師持其祖父母年譜行實請表於余曰韓祖父母
受

天子誥命將勒石以垂不朽願太夫子賜以如椽用光

泉壤余謹按贈君諱世奇字名世係太原郡之陽
邑人父旺泉公爲人卓犖不羣捐館時贈君方在
襁褓賴太孺人王矢靡他而育之提攜顧復如是
者有年然又慮孺子之無以教之也遣就傅贈君
舉止異凡兒出居學舍則口誦手披入侍慈闈則
昏定晨省初不敢玩愒遊佚重傷孀母心故年甫
弱冠卽青其衿旋補增廣弟子員爲文清真矯健
絕去鉛華明毛鄭詩善講說谷邑人士相與執經
而考疑者繼於門且爲人丰神俊朗意氣豪邁親

朋輩偶有忿爭輒爲排解之兩造遂平性好施予
家本貧甚見有窶人子輒以錢粟資之不責其償
蓋蚤已爲昌後地矣元配杜氏贈孺人婦道克嫻
相夫子無違德太孺人王老且病孺人朝夕侍飲
食藥餌無倦容撫子若女恩義備至而待臧獲則
一以慈無疾言厲色固婉婉之教所不及者續娶
趙孺人性行和淑庭無間言贈君卒於康熙辛未
年九月三十日享年五十有三杜孺人先君卒者
十四年享年三十有九趙孺人後君卒三年享年